


"Prome fase di proyecto Pre-Clearance ta inicia e aña aki ainda"



ORANJESTAD (AAN): E reunionnan cu formador Eman y su team ta tene cu e diferente partnernan den comunidad ta sigui nan rumbo. E combersacionnan aki ta tuma lugar den cuadro di e tarea specifico cu Gobernador Refunjol a duna formador.

Diaranzon a toca turno na un delegacion di Triple A y AZV pa sinta cu formador y su team. Director di Triple A Steinmetz, kende a wordo compaña pa sr. Benschop, ta satisfecho con e reunion a bay. Director di Triple A sr. Peter Steinmetz a bisa cu nan a papia largo sin sa mes ya cu e tempo a bula dor cu e intercambio di pensamento tabata masha interesante, habri y den forma sensato.

"Nos a papia un poco riba presente y hopi riba futuro di aeropuerto. Unda nos ta para awe y unda nos ta bay. Esaki ta conta tanto pa Aruba mes, e aeropuerto como tambe e economia".

Steinmetz a conta cu diferente punto di atencion a wordo treci dilanti manera pensioen di empleadonan y di prima di AZV. Esaki en general como dunador di trabou. A papia



tambe riba e sector turistico y con aeropuerto ta bay desaroya su mes den e añanan benidero. A discuti riba inversionnan planea y pakico. "Banda di tur esaki nos a papia tambe riba puntonan di preocupacion y nan solucionnan".

Triple A recientemente a renoba su masterplan cu ta e plan total con acomoda su crecimiento den volumen den e proximo 10, 20 pa 25 aña. E masterplan aki ta trece diferente proyecto cu ne. "Nos ta kere cu como aeropuerto nos por crece te cu 3 miyon pasahero, pero esaki ta depende grandemente riba e desaroyo economico di e sector hotelero y di e cantidad di turista cu por

bishita e isla".

Un punto interesante cu tambe a haya atencion ta e proyecto Pre-Clearance pa Europa (Schengen gebied). "Nos a trece dilanti loke cu nos ta kere ta e posibilidadnan cu tin. Tin un grupo di trabou conhunto den cual Triple A ta wordo representa cu ta trahando riba e proyecto aki.

Gobierno di Hulanda y Aruba hunto cu Schiphol tambe ta envolvi den e grupo di trabou aki. Nan actividadnan ta canando cu pasonan acelera", Steinmetz a comenta. Intencion ta pa start cu e prome fase di e proyecto Pre-Clearance e aña aki ainda.